


法苑珠林

才三十四

四百八十四
隸四

51412



法苑珠林卷第三十四

隸

大唐上都西明寺沙門釋道世撰

攝念篇第二十八此有部發願篇第二十九

迷意部第一

惟夫凡情難禁譬等山猿常隨外境類同狂象三業鼓動緣構滋彰故佛立教令常制御

故經云當為心師不師於心身口意業不與惡交身戒心慧不動如山又經云制之一處無事不辦然心性或倒我見為先煩惑難攝亂使常行於一切時高舉頗屈自非託處寂靜摧伏三毒身不遊行口默緘言少睡多覺常坐省食思量正法知非有無直身正意繫

念在前如斯等教是名攝念也

引證部第二

如增一阿含經云介時世尊告諸比丘當修行十法便成神通去衆亂想至致涅槃一謂念佛二謂念法三謂念衆四謂念戒五謂念施六謂念天七謂念休息八謂念安般九謂念身非常十謂念死當善修行

佛法聖衆念

戒施及天念

休息安般念

身死念在後

第一念佛者專精念佛如來

形相功德具足身智無崖周旋往來皆具知之修行一法自致涅槃不離念佛便獲功德是名念佛 第二念法者專精念法除諸欲

愛無有塵勞渴愛之心永不復興於欲無欲
離諸結縛諸蓋之病猶如衆香之氣無有瑕
疵亂想之念便成神通自致涅槃思惟不離
便獲功德是名念法 第三念衆者謂專
精念如來聖衆成就質直無有邪曲上下和
穆如來聖衆四雙八輩當敬承事除諸亂想
自致涅槃不離僧念便獲功德是名念僧
第四念戒者所謂戒者息諸惡故戒能成道
令人歡喜戒瓔珞身現衆好故猶如吉祥瓶
所願便冠除諸亂想自致涅槃不離戒念便
獲功德是名念戒 第五念施者謂專精念
施所施之上永無悔心無反報想快得善利

若人罵毀相加刀杖當起慈心不興瞋恚我
所施者施意不絕除諸亂想自致涅槃不離
施念便獲功德是名念施 第六念天者謂
專精念天身口意淨不造穢行行戒成身身
放光明無所不照成彼天身善業果報成彼
天身衆行具足除諸亂想自致涅槃不離天
念便獲功德是名念天 第七念休息者謂
心意想息志性詳諦亦無卒暴恒專一心意
樂閑居常求方便入三昧定常念不貪勝光
上達除諸亂想自致涅槃不離休息便獲功
德是名念休息 第八念安般者謂專精念
安般者若息長時觀知我今息長若復息短

亦當觀知我今息短若息極冷極熱亦當觀
知我今息冷熱出入分別數息長短除諸亂
想自致涅槃不離安般便獲功德是名念安
般 第九念身者謂專精念身髮毛爪齒皮
肉筋骨膽肝肺心脾腎大腸小腸胃直膀胱
屎尿百葉滄蕩脾泡溺淚唾涕膿血脂羨鬪
髓腦等何者是身地種水種火種風種是也
皆是父母所造從何處來爲誰所造此之六
根於此終已當生何處除諸亂想自致涅槃
不離念身便獲功德是名念身 第十念死
者謂專精念死此沒生彼往來諸趣命逝不
停諸根散壞如腐敗木命根斷絕種族分離

無形無響亦無相貌除諸亂想自至涅槃不離死念便獲功德是名念死而說偈曰

佛法及聖衆 乃至竟死念 雖與上名同

其義各別異 又分別功德論云第一念佛

何事佛身金剛無有諸漏若行時足離地四

寸千輻相文跡現於地足下諸虫七日安隱

若其命終皆得生天昔有一惡比丘本是外

道假服誹謗逐如來行自殺飛虫著佛跡處

言佛蹈殺然虫雖死遇佛跡處尋還得活若

入城邑足蹈門闕天地大動百種音樂不鼓

自鳴諸翳盲瘖百病自除覩佛相好隨行得

度功德所濟不可稱計物會万行運載爲先

所謂念佛其義如此 第二念法者法是無漏道無為無欲佛者是諸法之主法者是結使之主法出諸佛法生佛道若然者何不先念法後念佛耶答曰法雖微妙無能知者猶若伏藏無處不有要籍通人示處方得自濟窮乏法亦如是理雖玄妙非如來不暢是以念佛在先稱法為後 第三念僧者謂四雙八輩十二賢士捨世貪諍開道寸天人則是衆生良祐福田故昔有薄福比丘名梵摩達律名羅旬喻比丘也在于二百五十衆中令衆僧不得食莫知誰各佛使分為二部一部得一部不得復分不得為二部半得半不得如是展轉乃

至二人一得食一不得食乃知無福雖得至鉢自然消化佛愍其厄自手授食在於鉢中神力所制不能化去佛欲令現身得福故令二滅盡比丘以食飽此即時得福時波斯匿王聞此薄福佛愍與食我今亦當為其設福即遣牝米時有一鳥飛來銜一粒米去使人呵曰王為梵摩達設福汝何以持去耶鳥即持還本處所以然者此比丘蒙僧福力鳥獸不能侵害也用是證知為良福田既自度度人至三乘道念衆之法其義如此 第四念戒皆從五戒十戒二百五十至五百戒皆禁制身口歛諸耶非歛御六情斷諸欲念中表

清淨乃應戒性昔有二比丘共至佛所路經
曠澤頓乏水漿時有小池注水衆虫滿中一
比丘深思禁律以無犯為首若飲此水殺生
甚多寧全戒殞命於是命終即生天上一比
丘自念飲水全命可至佛所焉知死後當生
何趣即飲虫水所害甚多雖得見佛啼泣向
佛自云同伴命終佛拍一天曰汝識此天不
此是汝伴以全戒功即生天上今來在此鄉
雖見我去我大遠彼雖喪命常在我所卿今
見我正覩我肉形豈識真戒乎以是經云波
羅提木义是汝大師若能持戒展轉行之即
是如來法師常在而不滅也夫戒有三種一

是俗戒二是道戒三是定戒五八十具戒等
爲俗戒無漏四諦爲道戒三昧禪思爲定戒
以慧御戒使成無漏乃合道戒聲聞家戒喻
若膝華動則解散大士持戒喻若頭上插華行
止不動小乘檢形動則越儀大士領心不拘
外軌大小軌異故以形心爲殊內外雖殊俱
至涅槃故曰念戒也 又佛般泥洹經云又
欲近道當有四喜宜善念行一曰念佛意喜
不離二曰念法意喜不離三曰念衆意喜不
離四曰念戒意喜不離念此四喜必令具足
而自了見當望正度求解身要可以除斷地
獄畜生餓鬼之道雖往來走天上人中不過

七生自得苦際 又三千威儀云當念有五
事一當念佛功德二當念佛經戒三當念佛
智慧四當念佛恩大難報五當念佛精進乃
至泥洹復有五事一當念比丘僧二當念師
恩三當念父母恩四當念同學恩五當念一
切人皆使解脫離一切苦 又處處經云譬
如大海中沙不能計知如人所作善惡殃福
前後所作不可復計要在命盡作惡逢惡處
作善逢善處殃福皆預有處亦預有父母兄
弟妻子眷屬等得道便止若不得道便不斷
絕佛語比丘當念自身無常有一比丘即報
佛言我念非常如人在世間極可至五十歲

佛言莫說是語復有一比丘言可三十歲佛
言莫說是語復有一比丘言可十歲佛言莫
說是語復有比丘言可一歲佛言莫說是語
復有一比丘言可一月佛言莫說是語復有
一比丘言可一日佛言莫說是語復有一比
丘言可一時佛言莫說是語復有一比丘言
可呼吸間佛言是也佛言出息不還則屬後
世人命駿速在呼吸之間又毗尼母經云若
說法比丘復應常念觀身苦空無常無我不
淨莫使有絕何以故當得十二念成聖法故
何者十二念一念成就己身二念成就他人
三念願得人身四念生種性家五念於佛法

中得生信心六念所生處不加其功而得悟
法七念所生處諸根完具八念值佛世尊出
現於世九念所生處常得說正法十念願所
說法常得久住十一念願法久住得隨順修
行十二念常得憐愍諸衆生心故得此十二
念具足必得聖法 又雜阿含經云尔時世
尊告諸比丘過去世時有河中草有龜於中
住止時有野干飢行覓食遙見龜垂疾來捉
取龜垂見來即便藏六野干守伺莫出頭足
欲取食之久守龜垂永不出頭亦不出足野
干飢乏瞋恚而去諸比丘汝等今日亦復如
是知魔波旬常伺汝便莫汝眼著於色耳聞

聲鼻嗅香舌嘗味身著觸意念法欲今出生
深著六境是故比丘汝等今日當執持眼
律儀住執持眼根律儀惡魔不得其便隨出
隨緣耳鼻舌身意亦復如是於其六根若出
若緣不得其便猶如龜虫野干不得其便尔
時出尊即說偈言

龜虫畏野干

藏六於殼內

比丘善攝心

密藏諸覺想

不依不怖彼

覆心勿言說

尔時世尊告諸比丘譬如士夫遊空宅中得

六種衆生一者得狗即執其狗繫著一處次

得其鳥次得毒蛇次得野干次得失收摩羅

次得猕猴得斯衆生悉縛一處其狗者樂欲

入村其鳥者常欲飛空其虵者常欲入穴其
野干者樂向塚間失収摩羅者長欲入海獠
猴者欲入山林此六衆生悉縛一處各各嗜
欲到所安處各不相樂於他處所而繫縛故
各用其力向所樂方而不能脫如是六根種
種境界各各自求所樂境界不樂餘境界眼
常求可愛之色不可意色則生其厭耳鼻舌
身意亦復如是此六種根種種行處各各不
求異根境界其有力者堪能自在隨覺境界
如彼士夫繫六衆生是故當勤修習身念觀
尔時世尊告諸比丘譬如有四虻虵凶惡毒
熾盛一篋中時有士夫聰明求樂厭苦求生

獸死時有一士夫語向士夫言汝今取此篋
蚰摩拭洗浴恩親養食出內以時若四毒蚰
脫有惱者或能殺汝或令近死汝當防護尔
時士夫畏四毒蚰及五拔刀仗驅驅而走人
復語言士夫內有六賊隨逐伺汝得便當殺
汝當防護尔時士夫畏四毒蚰五拔刀怨及
內六賊恐怖馳走還入空村見彼空舍危朽
腐毀有諸惡物但皆危脆無有堅固人復語
言士夫是空聚落當有六賊來必奄汝尔時
士夫畏四毒蚰五拔刀賊內六惡賊空村群賊
而復馳走忽尔道路臨一大河其水復急但
見此岸有諸怖畏而見彼岸安隱快樂清淨

無畏而無橋舩可度得至彼岸作是思惟我
取草木縛束成棧手足方便度至彼岸作是
念已即拾草木依於岸傍縛束成棧手足方
便截流橫度如是士夫免四毒虵五拔刀怨
六內惡賊復得脫於空村群賊度於彼流離
於此岸種種怖畏得至彼岸安隱快樂我說
此譬當解其義比丘篋者譬此身色麤四大
四大所造精血之體穢食長養沐浴衣服無
常變壞危脆之法毒虵者譬如四大地界水
界火界風界地若諍能令身死及以近死水
火風諍亦復如是五拔刀怨者譬五受陰內
六賊者譬六憂喜空村者譬六內入觀察眼

入之處是無常變壞虛偽之法耳鼻舌身意亦復如是空村群賊者譬外六入處眼爲可意不可意色所害耳聲鼻香舌味身觸意法亦復如是復流者譬如四流欲流有流見流無明流河譬三愛欲愛色愛無色愛此岸多恐怖者譬有身彼岸清涼安樂者譬無餘涅槃棧者譬八正道手足方便截流度者譬精進勇猛得到彼岸婆羅門住處者譬如來應等正覺 又木患子經云時有難國王名波琉璃白佛言我國邊小頻歲寇賊五穀涌貴疫疾流行人民困苦我恒不安法藏深廣不得修行唯願垂矜賜我法要佛告王言若欲滅

煩惱障者當貫木患子一百八常以自隨至
心無散稱南無佛陀南無達摩南無僧伽名
乃過一木患子如是漸次度木患子若十二
十若百若干乃至百十萬若能滿二十萬遍身
心不亂諸諂曲者捨命得生第三焰摩天衣
食自然常安樂行若復能滿一百萬遍者當
斷除百八結業獲無上果王聞歡喜我當奉
行佛告王曰有莎升比丘誦三寶名經歷十
歲得成斯陀含果漸次修行今在普香世界
作辟支佛王聞是已倍復修行 又賢愚經
云波羅柰國有居士字曰毘提此人有子名
優波毘提後年長大家貧憊前父付財物居

肆販賣有耶貫鞞阿羅漢往到其邊而爲說
法教使繫念以白黑石子用當籌筭善念下
白惡念下黑優波瓠提奉受其教善惡之念
輒投石子初黑偏多白者尠少漸漸修習白
黑正等繫念不止更無黑石純有白者善念
已盛速得初果 又譬喻經云昔有人不信
敬婦甚事佛婦白誓曰人命無常可修福德
誓無心嬾惰婦恐將來入地獄中即復白誓
慾懸一鈴安著戶上君出入時棠鈴作聲稱
南無佛誓曰甚善如是經久其誓命終獄卒
以之擲鑊湯中以棠鑊作聲謂是鈴聲稱南
無佛獄官聞之此人奉佛放令出去得生人中

又雜譬喻經云昔有五百賈客乘船入海值
摩竭魚出頭張口欲食衆生時日少風而船
去如箭薩薄主語衆人言船去太疾可捨恍
如言捨下船去轉便不可得止薩薄主問樓
上人言汝見何等我見上有兩日出下有白
山中有黑山薩薄主驚言此是大魚當柰何
哉我與汝等今遭困厄入此魚腹無有活理
汝等各隨所事一心求之於是衆人各隨所
奉一心歸命求脫此厄所求逾篤船去逾疾
湏臾不止當入魚口於是薩薄主告諸人言
我有大神号名爲佛汝等各捨奉神一心稱
之時五百人俱發大聲稱南無佛魚聞佛名

自思惟言今日世間乃復有佛我當何忍傷害衆生即便閉口水皆倒流轉得遠魚五百賈人善心即生皆得解脫又大集經云譬如沙門自有頭髮生不知日長幾分如是菩薩罪生不能自知言我無罪者又雜阿含經介時世尊說偈言 善護於身口 及意一切業

慙愧而自防

是名善守護

介時世尊告諸比丘有二淨法能護世間何等為二所謂慙愧假使世間無此二淨法者世間亦不知有父母兄弟姊妹妻子宗親師長尊卑之緒顛倒渾亂如畜生趣即說偈言世間若無有 慙愧二法者 遠越清淨道

向生老病死 世間若成就 慙愧二法者

增長清淨者 永開生死門

又惟無三昧經云佛告阿難善男子人求道
安禪先當斷念人生世間所以不得道者但
坐思想穢念多故一念來一念去一日一宿
有八億四千萬念念不息一善念者亦得

善果報一惡念者亦得惡果報如響應聲如

影隨形是故善惡罪福各別 頌曰

靜念遺忘慮 有慮非理盡 境來投虛空

虛空何所軫 託陰遊重冥 冥亡影迹隕

四果皆欣求 一乘獨玄泯

發願篇第二十九 此有二部 述意部第一

夫佛果實絕登之有階法雲峻極屆之有漸
是以剗發大誠則玄福招於極果初立弘誓
則妙願遍於來際一念興行遂感塵劫之瑞
華半刻虔躬乃得大千之甘露蓋是大乘之
根基種智之津衢也 引證部第二

如阿彌陀經云佛語阿難阿彌陀佛為菩薩
時常奉行是二十四願珍寶愛重保持恭順
何等為二十四願 第一願使某作佛時令
我國中無有泥黎禽獸薜荔蝸飛蠕動之類
得是願乃作佛不得是願終不作佛 第二
願使某作佛時今我國中無有婦人女人欲
來生我國中者即作男子諸無央數天人

蛸飛蠕動之類來生我國者於七寶水池蓮
華中化生長大皆作菩薩阿羅漢都無央數
得是願乃作佛不得是願終不作佛 第三
願使其作佛時令我國土自然七寶廣縱甚
大曠蕩無極自然軟好所居舍宅被服飲食都
皆自然比如第六天王所居處得是願乃作
佛不得是願終不作佛 第四願使其作佛
時令我名字皆聞八方上下無央數佛國皆
令諸佛各於比丘僧大座中說我功德國土
之善諸天人民蛸飛蠕動之類聞我名字莫
不慈心歡喜踊躍者皆今來生我國得是願
乃作佛不待是願終不作佛 第五願使其

作佛時令八方上下諸無央數天人民及蚰
飛蠕動之類若前世作惡聞我名字欲來生
我國者即便反正自悔過爲道作善便持經
戒願欲生我國不斷絕壽終皆令不復泥黎
禽獸薜荔即生我國在心所願得是願乃作
佛不得是願終不作佛 第六願使其某作佛

時令八方上下無央數佛國諸天人民若善
男子善女人欲來生我國用我故益作善若
分檀布施遶塔燒香散華然燈懸雜繒綵飯
食沙門起塔作寺斷愛欲齋戒清淨一心念
我晝夜一日不斷絕皆令來生我國作菩薩
得是願乃作佛不得是願終不作佛 第七

願使其作佛時令八方上下無央數佛國諸
天人民若善男子善女人有作菩薩道奉行
六波羅蜜經若作沙門不毀經戒斷愛欲齋
戒清淨一心念欲生我國晝夜不斷絕若其
人壽欲終時我即與諸菩薩阿羅漢共飛行
迎之即來生我國則作阿惟越致菩薩智慧
勇猛得是願乃作佛不得是願終不作佛
第八願使其作佛時令我國中諸菩薩欲到
他方佛國生者皆令不更泥黎禽獸薜荔皆
令得佛道得是願乃作佛不得是願終不作
佛 第九願使其作佛時令我國中諸菩薩
阿羅漢面目皆端正淨潔姝妙悉同一色都

一種類比如第六天人得是願乃作佛不得
是願終不作佛 第十願使其某作佛時令我
國中諸菩薩阿羅漢皆同一心所念欲所言
者預相知意得是願乃作佛不得是願終不
作佛 第十一願使其某作佛時令我國中諸
菩薩阿羅漢皆無有姪洙之心終無念婦女
意終無有瞋怒愚癡者得是願乃作佛不得
是願終不作佛 第十二願使其某作佛時令
我國中諸菩薩阿羅漢皆令心相敬愛終無
相嫉憎者得是願乃作佛不得是願終不作
佛 第十三願使其某作佛時令我國中諸菩
薩欲共供養八方上下無央數諸佛皆令飛

行即到欲得自然萬種之物即皆在前持用
供養諸佛悉皆得遍以後日未中時即飛行
還我國得是願乃作佛不得是願終不作佛
第十四願使其作佛時今我國中諸菩薩阿
羅漢欲飯時即皆自然七寶鉢中有自然百
味飯食在前食已自然去得是願乃作佛不
得是願終不作佛 第十五願使其作佛時
今我國中諸菩薩身皆紫磨金色三十二相
八十種好皆令如佛得是願乃作佛不得是
願終不作佛 第十六願使其作佛時今我
國中諸菩薩阿羅漢語者如三百鍾聲說經
行道皆如佛得是願乃作佛不得是願終不

作佛 第十七願使其作佛時令我洞視徹
聽飛行十倍勝於諸佛得是願乃作佛不得
是願終不作佛 第十八願使其作佛時令
我智慧說經行道十倍於諸佛得是願乃作
佛不得是願終不作佛 第十九願使其作
佛時令八方上下無央數佛國諸天人民蚩
飛蠕動之類皆令得人道悉作辟支佛阿羅
漢皆坐禪一心共欲計數知我年壽幾千億
萬劫歲數皆令無有能極知壽者得是願乃
作佛不得是願終不作佛 第二十願使其
作佛時令八方上下各千億佛國中諸天人
民蚩飛蠕動之類皆令作辟支佛阿羅漢皆

坐禪一心共欲計數我國中諸菩薩阿羅漢知有
幾千億万人皆令無有能知數者得是願乃作佛不
得是願終不作佛 第二十一願使其作佛時令我
國中諸菩薩阿羅漢壽命無央數劫得是願乃
作佛不得是願終不作佛 第二十二願使其作佛
時令我國中諸菩薩阿羅漢皆智慧勇猛自知
前世億萬劫時宿命所作善惡却知無極皆洞
視徹知十方去來現在之事得是願乃作佛
不得是願終不作佛 第二十三願使其作
佛時令我國中諸菩薩阿羅漢皆智慧勇猛
頂中皆有光明得是願乃作佛不得是願終
不作佛 第二十四願使其作佛時令我頂

中光明絕好勝於日月之明百千億万倍絕
勝諸佛光明燄照諸無央數天下幽冥之處
皆當大明諸天人 民蚩飛蠕動之類見我光
明莫不慈心作善者皆今來生我國得是願
乃作佛不得是願終不作佛佛告阿難阿彌
陀佛爲菩薩時當奉行是二十四願不犯道
法絕去財色精明求願積功累德無央數劫
今致作佛悉皆得之不亡其功也又佛說滅
十方眞經云時有釋種童子名曰善悅來白
佛言唯天中天今我二親身不安和橫爲非
人所見侵燒晝夜寤寐不得寧息出入行步
亦見逼惱或遭非人妖蠱姦邪無以防護唯

願世尊告示以法隨時救濟今無燒害佛告
面善悅當爲汝說擁護之法 佛言東方去
此過于八千那術佛土有世界名拔衆塵勞
其佛号等行如來今現在說法人若東行先
當稽首歸命供養於東方佛則無恐懼莫敢
侵燒有所興作悉當如願 佛告童子南方

去此過于十億百千億土有世界名消冥等
要脫其佛号初發心念離恐懼歸依超首如
來今現在說法若欲南行當遙稽首歸命彼
佛專意不離則無恐懼不遇患難 佛告童
子西方去此如恒河沙諸佛刹土有世界名
善選擇其佛号金剛步迹如來今現在說法

若欲西行先當稽首禮於彼佛一心歸命則
無恐懼不逢患難 佛告童子北方去此過

二万佛土有世界名覺辯其佛号寶智首如
來今現在說法若欲行設在家居稽首作禮
歸命彼則無恐懼不遇患難 佛告童子東

北方去此過于百万億佛土有世界名持所
念其佛号壞魔慢獨步如來今現在說法若
諸東北方當遥稽首歸命彼佛所在獲安則
無所畏 佛告童子東南方去此過二恒河

沙等佛土有世界名常照曜其佛号初發心
不退轉輪成首如來今現在說經若東南方
行先當稽首五體投地一心歸命然後乃進

則無恐懼 佛告童子西南方去此過于八

万佛土有世界名覆白交露其佛号寶蓋照
空如來今現在說法若西南行先當稽首彼
方如來以華遙散念於無相然後乃進則無
恐懼 佛告童子西北方去此過六恒河沙
佛之刹土有世界名住清淨其佛号開化菩
薩如來今現在說法若西北方行先禮彼佛
自歸悔過淨修梵行然後出家則無恐懼

佛告童子下方去此過九十二娑佛之刹土
有世界名念無倒其佛号念初發意斷疑拔
欲如來今現在說法若欲坐時若夜卧時念
斯如來稽首自歸常以普慈念救衆生然後

坐卧則無恐懼所願必果

佛告童子上方

去此過六十恒河沙等佛土有世界名離諸
恐懼無有處所其佛号消冥等超王如來今
現在說法若從坐起常禮彼佛自歸供養則
無恐懼所至獲安 佛言童子假使有人受
此經典諷讀誦為他人說具足備悉令不缺
減速成所願終無恐懼若到縣官不見侵枉
若行賊中不見危害若行大火中即為消滅
若行大水中終不沒溺天龍鬼神弊惡之神
無敢觸者諸惡獸無敢近者諸鬼魍魎無能
燒者若在閑居獨處則為如來之所擁護佛
說如是帝釋善面悅童子等聞經歡喜作禮

而退 又地持論云菩薩發願略說五種一
發心願二生願三境界願四平等願五大願
彼菩薩初發無上菩提心是名發心願願未
來世為衆生故隨善趣生是名生願願正觀
諸法無量等諸善根思惟境界是名境界願
願未來世一切菩薩善攝事是名菩薩平等
願大願者即平等願 菩薩又說十種大願
一者願一切種供養供養無量諸佛 二者
願護持一切諸佛正法 三者願通達諸佛
正法 四者願生兜率天乃至般涅槃 五
者願行菩薩一切種正行 六者願成熟一
切衆生 七者願一切世界悉能現化 八

者願一切菩薩一心方便以大乘度 九者願一切正行方便無礙 十者願成無上正覺 是菩薩住於初地方便淨信現在修行於未來事生十大願 一者以清淨心常願供養一切諸佛二者受持守護諸佛正法三者勸請諸佛轉未曾有法四者順行菩薩正行五者一切器界具足成熟六者一切世界悉能現化七者自淨佛土八者一切菩薩同一方便以大乘化九者利益衆生一切不空十者一切世界得阿耨菩提作一切佛事 如是大願能生無量百千大願不離衆生界不離世間此諸大願生生常行終不忘失又

華嚴經云諸佛子菩薩住歡喜地以十願為
首生如是等百万阿僧祇大願以不可盡法
而生是願為滿是願勤行精進何等為十一
衆生不可盡二世界不可盡三虛空不可盡
四法界不可盡五涅槃不可盡六佛出世不
可盡七諸佛智慧不可盡八心所緣不可盡
九起智不可盡十世間轉法輪智轉不可盡
若衆生盡我願乃盡乃至起智轉盡我願乃
盡而衆生乃至起智諸轉實不可盡我諸願
善根亦不可盡 又文殊師利問菩提經云
今時天子問文殊師利言菩薩有幾心能攝
因能攝果文殊答言諸菩薩有四心能攝因

攝果何等為四一初發心二行道心三不退
轉心四一生補處心初發心為行道心作因
緣行道心為不退轉心作因緣不退轉心為
一生補處心作因緣也 又初發心如種穀
田中行道心如穀子增長不退轉心如華果
始成補處心如華果有用 又初發心如車
匠集材行道心如斫治材木不退轉心如安
施材木一生補處心如車成運致 又初發
心如月新生行道心如月五日不退轉心如月
十日一生補處心如月十四日如來智慧如月
十五日 又初發心能過聲聞地行道心能
過辟支佛地不退轉心能過不定地一生補

處心安住定地

又初發心如病者求藥

行道心如分別藥不退轉心如病服藥補處

心如病得瘥

又大集經云尔時舍利弗白

佛言世尊菩薩初發無上菩提心時聞諸

衆生有如是行不驚不怖是事實難不可思

議佛言舍利弗於意云何如師子雖復初產

聞師子吼有怖畏不不也世尊菩薩摩訶薩

初發無上菩提心時聞衆生行亦復如是舍

利弗於意云何火熱雖小畏乾薪不不也世

尊菩薩初發無上菩提心已得智慧火亦復

如是舍利弗今以非喻爲喻舍利弗譬如猛

火與諸乾薪結期七日當大戰鬪尔時一切

乾樹草木種種枝葉悉共合聚如須彌山尔
時猛火有一親友而告之言汝今何故不自
莊嚴多覓有救援助彼衆汝唯一已何能當
之時火答言彼怨雖多我力能敵不須伴黨
舍利弗菩薩摩訶薩亦復如是雖諸煩惱悉
共和合其熱熾盛菩薩智慧力能消伏如何
伽陀一九之藥能破大毒菩薩智慧亦復如
是小智慧藥能壞無量大煩惱毒 又佛本
行經云尔時佛告諸比丘僧作如是言汝諸
比丘我念往昔久遠之時有一貧人以乞自
活從一城至波羅柰城至彼城已其城所有
乞人見者皆呵責言汝從何來而至於此遂

遮不聽遊行告乞。爾時彼人見有障礙，作是
思惟：我於彼輩無有過失，何故障我而乞告
也。於時波羅柰城有一長者，遺失銅鉢，時彼
長者求覓銅鉢，所在不獲，因求鉢，故至餘一
村時，彼乞人於糞聚中得彼銅鉢，掛於杖頭。
將來往入波羅柰城，從街至街，從巷至巷，從
此交巷至彼交巷，從此嶮角至彼嶮角。口唱
是言：此之銅鉢是誰之物？識者收取，而彼遊
歷處處，東西求覓其主，了不能得。既不得主，
便即往至付梵德王，乃至長者。後聞有人從
彼糞中得銅鉢，掛於杖頭，將來入彼波羅柰
城，處處遊訪，不知主處。既不得主，便付梵德

王既聞是已到梵德王邊到已白言大王當
知前者乞人所奉銅鉢是我之物時梵德王
遣使往喚彼之乞人而語之言汝於前者所
送銅鉢今此長者云是我許其事如何彼人
即白梵德王言如是大王我本不知彼之銅
鉢是誰之物在糞聚中我既得已即掛杖頭
將來入城東西訪問不知主處遂奉大王住
王所用尔時梵德聞彼語已心大歡喜而告
彼言人者汝今欲於我邊乞何等願我當與
汝而彼銅鉢還其長者尔時彼人白梵德王
作如是言大王今若心欲觀喜與我願者願
王於此波羅素城所有乞人用我為乞人王

也時梵德王復告彼言今者何用與彼乞兒
而為王也但當更乞諸餘好願或金或銀或
索國中最勝村落用為封邑我即與汝時彼
乞人復白王言王若觀喜與我願者我今正
欲彼前所願王遂報言任汝所樂隨汝作耳
爾時在彼波羅柰城合有五百乞兒依住彼
乞願者悉喚令集而告之言我今得與汝等
為王汝等必當聽我處分時諸乞人問彼王
言汝今云何處分我等今作何事時彼人言
汝等相共或有捉我置髀上者或有取我而背
負者自餘皆悉為我左右圍遶而行而彼五百
諸乞兒輩聞彼語已即從處分或有與者或背

負者處處遊行所有飲食坐席之所即往彼
乞乞已將向一處分張而共食散如是方便
多時活命時有一乞人屏處獨食摩呼荼迦
隋言歡余時乞王從其人邊奪取彼食已將
喜丸也走其王徒衆五百乞兒逐彼王走至於遠處
皆悉疲乏既疲乏已悉各迴還其彼乞王身
力壯健走而不乏更至遠已迴頭望看五百
乞兒悉皆不見既不見已入一園內取水洗
手坐於一邊欲食彼食未食之間便生悔心
我今不善我今何故於彼人邊奪取其食更
復誑我隨從人輩此食既多我食不盡若世
間內有諸聖人願知我意而來此者我即分

與發是心已有辟支佛名曰善賢從虛空飛騰而來在彼人前從空直下去其不遠其人遙見彼辟支佛威儀庠序行步齊肅舉動得所不緩不急見如是已於彼辟支佛所心得淨信得淨信已作如是念由我往昔所受貧煎及以現在皆悉不值如是福田於如是人不行布施恭敬供養我昔若值如是福田今日應不遭斯困頓亦不應被他逼切而得活命我今將此食奉上仙人未審此仙受納以不若蒙受者願我將來免此貧煎困厄之身作是念已即將此食奉此仙人然辟支佛有如是法唯現神通教化衆生更無別法時辟支佛受

取彼食從地騰空而去其人見彼歡喜踊躍
遍滿其體不能自勝以歡喜故頂戴拍掌遙
禮彼尊辟支佛足作是禮已心發是願願我
此身於未來世恒常值遇如是世尊或勝此
者而彼世尊所說之法願我一聞速得證解
又願我於未來世中在大威德豪族姓家爲
王治化更莫在彼貧兒之內復作是願生生
世世不墮惡道 佛告諸比丘作如是言汝
諸比丘若有心疑於彼之時波羅柰城乞兒
之王施辟支佛摩呼荼迦此是誰者莫作異
見婆提唎迦比丘是也時乞兒王施辟支佛
食因彼業果今生釋種大豪貴族資財無乏

少由昔願故今得王位又由昔願不隨惡道恒
生人天多受快樂又由昔願今值於我而得
出家受具足戒得羅漢果我又授記於我聲
聞弟子之中豪姓出家最第一者婆提唎迦
比丘是也

頌曰

賢人慕高節

志願菩提因

御鶴翔伊水

策馬出王田

本祈立弘誓

感報弥陀身

能仁修八正

超逾九劫前

聲流遍三界

慈化通大千

掃塵息妄想

九聖並欣然

含生同志趣

保益啓心神

生死必永盡

豈同莊老仙

法苑珠林卷第三十四

隸

釋音

嶠

反

五

俱

骨

反

補

各

反

竹

苒

反

鄮

音

婆

綵

反

所

成



